



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL.Anr.389-2/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët– Skender Çoçaj kryesues, Bujar Muzaqi dhe Kymete Kicaj anëtarë, duke vendosur lidhur me ankesën e Avni Gashi, kandidat për anëtarë të kuvendit komunal në Komuna Istog, nga radhët e Subjektit Politik Aleanca për Ardhmërinë e Kosovës (AAK), me seli në Prishtinë, dega në Istog, paraqitur kundër vendimit të Komisionit Qendror të Zgjedhjeve (KQZ) me seli në Prishtinë, Nr.01/3093-2025, të datës 03.11.2025, për shpalljen e rezultateve përfundimtare për anëtarë të kuvendit komunal, për Zgjedhjet Lokale, të mbajtura me datën 12 Tetor 2025, në seancën e panelit të mbajtur, më datë 14.11.2025, merr këtë,

V E N D I M

REFUZOHET E PABAZUAR ankesa ZL.Anr.389/2025, e datës 04.11.2025, e parashtruar Avni Gashi, kandidat për anëtarë të kuvendit komunal në Komuna Istog, nga radhët e Subjektit Politik Aleanca për Ardhmërinë e Kosovës (AAK), me seli në Prishtinë, dega në Istog, paraqitur kundër vendimit të Komisionit Qendror të Zgjedhjeve (KQZ) me seli në Prishtinë, Nr.01/3093-2025, të datës 03.11.2025, për shpalljen e rezultateve përfundimtare për anëtarë të kuvendit komunal, për Zgjedhjet Lokale, të mbajtura me datën 12 Tetor 2025.

A r s y e t i m

Më datë 04.11.2025, PZAP-i ka pranuar ankesën ZL.Anr.389/2025, nga Avni Gashi kandidat për anëtarë të kuvendit komunal në Komunën e Istogut, nga radhët e Subjektit Politik AAK me seli në Prishtinë, dega në Istog, i cili pretendon se në disa vendvotime janë bërë shkelje nga komisionarët e vendvotimit, përkatësisht në këto vendvotimet: SH.F.M.U “Hysni Zajmi” në Vrellë, VV 0606/03, VV 0606/04 dhe VV 0606/05, si dhe në VV 0602, dhe SH.F.M.U “Trepça” në Banjë të Pejës, VV 0602/02, VV 0602/03, VV 0602/05, VV 0602/06, VV 0602/07 si dhe votat me postë.

Sipas parashtruesit të ankesës në rezultatet përfundimtare për asamble komunale në Istog, kandidati nga radhët e subjektit politik AAK, me numër rendor 5, rezulton të ketë marrë 97 vota. Ndërsa sipas gjendjes faktike që është paraqitur në rezultatet e shpallura nga KQZ, si rezultate përfundimtarë për Asamble Komunale në Istog, rezulton që në disa qendra votimi dhe vendvotime, i njëjti ka më pak vota edhe pse votuesit e tij, kanë deklaruar me shkrim që kanë votuar në këto vendvotime dhe se në bazë të deklaratave të tyre, numri i votave do të duhej të ishte më i madh.

Në Qendrën e votimit Shkolla Fillore "Hysni Zajmi" në Vrellë: Vendvotimi 0606/03 sipas rezultateve të KQZ janë të publikuar gjithsejtë 21 vota, kurse i njëjti posedon 26 deklarata të votuesve të cilët pohojnë se kanë votuar numrin 5. Po ashtu në Vendvotimin 0606/04, sipas rezultateve të KQZ janë të publikuar gjithsejtë 10 vota, kurse i njëjti posedon gjithsej 18 deklarata të votuesve, Vendvotimi 0606/05, sipas rezultateve të KQZ janë të publikuara gjithsejtë 44 vota, ndërsa deklarata e komisionerit të AAK-së Sadeta Vuthaj dhe deklarata nga Vëzhguesi i LDK-se Hamdi Zeqiraj, i njëjti pretendon se ka marrë 50 vota.

Në Qendrën e votimit 0602, SH, F.M.U "Trepça" Banjë e Pejës, në Vendvotimin 0602/02, sipas rezultateve të KQZ janë të publikuara 0 vota, kurse sipas deklaratës në këtë vendvotim duhet të ketë 1 votë. Në Vendvotimin 0602/03, sipas rezultateve të KQZ janë të publikuara gjithsejtë 0 (zero) vota, kurse sipas deklaratave duhet ti ketë 2 vota. Në vendvotimin 0602/05, sipas rezultateve të KQZ janë të publikuara gjithsejtë 6 vota, kurse sipas deklaratave duhet të ketë 7 vota. Në vendvotimin 0602/06, sipas rezultateve të KQZ janë të publikuar gjithsejtë 3 vota, kurse i njëjti duhet ti ketë 6 vota. Në vendvotimin 0602/07, sipas rezultateve të KQZ janë të publikuar gjithsejtë 2 vota, kurse i njëjti duhet ti ketë 3 vota.

Më tej në ankesë pretendon se nga votimi me postë sipas rezultateve nga KQZ janë publikuar gjithsej 14 vota, kurse sipas dëshmisë së familjarëve dhe miqve i njëjti ka gjithsejtë 21 vota në total: 9 familjar/miq nga Gjermania, 6 familjar/miq nga Zvicra, 5 familjar/miq nga Austria, 1 mik nga Brukseli.

Si provë në ankesë ka bashkangjitur deklarata të votuesve dhe komisionerëve, Kërkon që të bëhet rinumërimi i votave.

Në përgjigjen në ankesë KQZ-ja, sqaron se bazuar në nenin 101 të Ligjit Nr. 08/ L-228 për Zgjedhjet e Përgjithshme në Republikën e Kosovës (LZP), Rregulloren Zgjedhore Nr.16/2024, Qendrat Komunale të Numërimit (QKN), Procedura e Veprimit në Qendrën Komunale të Numërimit për Zgjedhjet Lokale 2025, e miratuar më 01.10.2025, NI-.01/2601/2025, përcaktohet procedura e detajuar lidhur me procesin e numërimit në QKN. Rezultatet preliminare nga vendvotimet mund të korrigjohen në Qendrën Komunale të Numërimit, në përputhje me paragrafin 3 të nenit 14 të Rregullores Zgjedhore Nr. 16/2024 për Qendrat Komunale të Numërimit (QKN).

Andaj, bazuar në Rregullën Zgjedhore Nr.13/2024 Rezultatet e Zgjedhore nenin 9 paragrafi 1 thekson se: Në rast të mospërputhjes së rezultateve, KQZ-ja mund të urdhëroj rinumërimin e votave të cilit do VV, ose edhe përsëritjen e votimit në një VV apo QV.

KQZ, gjithashtu ju njoftoj se, procesi i numërimit të votave në Qendrën e Numërimit dhe Rezultateve (QNR) është zhvilluar në përputhje me Rregulloren Zgjedhore Nr. 14/2024, Qendra e Numërimit dhe Rezultateve (QNR) ku ekipet e numërimit kanë bërë numërimin e votave të kandidatëve në transparencë të plotë, ku fletëvotimi është prezantuar në ekran dhe është parë nga vëzhguesit e akredituar.

Më tej në përgjigje theksohet se më datën 03.09.2025, KQZ ka miratuar Procedurën Standarde të Veprimit për Votimin Jashtë Kosovës dhe Vlerësimin e Pakove me Fletëvotime. Në faqen 14 të kësaj procedure shpjegohet mënyra e vlerësimit të pakove me fletëvotime, ndërsa pas përfundimit të procesit të verifikimit të zarfeve me fletëvotime, DSHV dorëzon në QNR listën e votuesve të cilët kanë votuar përmes postës dhe zarfet me fletëvotime të

ndara në kuti sipas komunave të votuesve. (Shih të bashkangjitur Procedurën Standarde të Veprimit për Votimin Jashtë Kosovës dhe Vlerësimin e Pakove me Fletëvotime),

Bazuar në nenin 17 të Rregullores Zgjedhore nr. 17/2024 për Regjistrimin dhe Votimin Jashtë Kosovës parashihet numërimi i fletëvotimeve të dërguara me postë, sipas të cilës: 1 7, Fletëvotimet që janë dërguar përmes postës dhe fletëvotimet që janë hedhur në kutitë e votimit nga procesi i votimit në përfaqësinë diplomatike, numërohen në QNR.

Ndërsa në nenin 20 të Rregullores Zgjedhore nr.14/2024 për Qendrën e Numërimit dhe Rezultateve, parashihet procedura e numërimit të fletëvotimeve në QNR, përkatësisht, në paragrafin 9 të nenit 20 parashihet se: Zarfet e votimit me postë hapen dhe numërohen pas përfundimit të krahasimit të listave votuese të përcaktuara në nenin 18 të kësaj rregullore si dhe pas përfundimit të numërimit të votave në përfaqësi diplomatike,

Pala ankuese, ndër të tjera, ka pretenduar se disa nga familjarët kanë votuar për të mirëpo, sipas tij mungojnë votat e tyre. Ky pretendim nuk mund të vërtetohet, pasi që vota është e fshehtë dhe, në përputhje me parimet e fshehtësisë dhe lirisë së votës, dhe po ashtu në fletëvotim nuk mund të identifikohet emri i votuesit.

Sa i përket pretendimeve të palëve ankuese i cili mbështetet në pritshmërinë dhe deklaratimet e personave, dhe familjareve të tij, duhet theksuar se, në kuptim të nenit 4 paragrafi 1,3 të Ligjit për Zgjedhjet e Përgjithshme, liria dhe fshehtësia e votës janë të garantuara. Publikimi i votës cenon këtë parim dhe shpërfaq vullnetin e votuesit.

Parashtruesi i ankesës, nuk ka ofruar dëshmi të çarta dhe bindëse lidhur me shkeljet e supozuara për mospërputhje të rezultateve, edhe pse në kuptim të nenit 117 paragrafi 3 të LPZ-së, barra e të provuarit bie mbi ankuesin, dhe pretendimet e ankuesit nuk mbështeten në asnjë provë konkrete por janë supozime sepse pritet e ankuesit për të marr më shumë vota automatikisht nuk nënkupton se ka mospërputhje të rezultatit si dhe llogaritja matematikore nga ana e ankuesit nuk argumenton shkeljet e pretenduara.

Në kuptim të nenit 117 paragrafi 3 të LZP, gjatë shqyrtimit të ankesës është vërejtur se pala ankuese, po ashtu nuk ka bashkëngjitur prova relevante, që do të mund të dëshmonin apo mbështesnin pretendimet e saj. Pra, nuk ka bashkëngjitur libër të votimit në vendvotim dhe QKN, formularë, ose prova të tjera që do të mund të mbështesnin pretendimet e saj.

KQZ, ju njofton se i gjithë materiali zgjedhor, (duke përfshirë kamerat e sigurisë, Librat e Votimit dhe Formularët) gjenden në Qendrën e Numërimit dhe Rezultateve -QNR, dhe të njëjtat mund të verifikohen dhe hetohen nga PZAP dhe organet drejtësisë.

PZAP, pas shqyrtimit të kësaj anese, me vendimin ZL.A.nr.389/2025 të datës 05.11.2025, ka refuzuar ankesën e Avni Gashi, kandidat për asamble komunale në Komunën e Istogut, nga radhët e subjektit politik Aleanca për Ardhmërinë e Kosovës (AAK), .

Në procedurë ankimore, Gjykata Supreme e Kosovës, me aktvendimin A.A.nr.111/2025 të datës 11.11.2021, ka aprovuar ankesën e Avni Gashi, kandidat për asamble komunale nga radhët e subjektit politik AAK, Komuna Istog, dhe ka anuluar vendimin e PZAP-it ZL.A.nr.389/2025 të datës 05.11.2025, dhe çështjen e ka kthyer në rivendosje në PZAP.

Me rastin e rivendosjes sipas ankesës së lartë përmendur të ankuesit Avni Gashi, duke vepruar në tërësi sipas vërejtjeve të dhëna nga Gjykata Supreme e Kosovës, në aktvendimin A.A.nr.111/2025 i datës 11.11.2025, dhe me qëllim të vërtetimit të drejtë dhe të plotë të

gjendjes faktike, në këtë procedurë të rivendosjes, PZAP-i mblodhi dhe i hetoi prova nga KQZ, analizoi dhe vlerësoi të gjitha provat nga shkresat e lëndës, dhe nga gjitha shkresat dhe provat e gjetura erdhi në përfundim se:

- Ankesa është e pa bazuar

Paneli pas shikimit të shkresave të lëndës dhe përgjigjes në ankesë, vlerësoj se pretendimet e kandidatit për Asamble Komunale nga subjekti politik i AAK Avni Gashi dega Istog, janë të paqëndrueshme dhe si të tilla i refuzoj për faktin se nga veprimet e përshkruara në ankesë dhe as pas hetimeve të bëra nga PZAP nuk është arritur që të vërtetohen se ka pasur parregullësi në qendra të votimit të cekura në ankesë dhe nga fletëvotimet e arritura me postë.

Kandidati në fjalë nuk ka sjell prova që dëshmojnë numrin e saktë të votave që i mungojnë dhe nuk e ka provuar me dëshmi të mjaftueshme, ndërsa provat e bashkangjitura në ankesë dhe atë deklaratat votueseve të tij të cilët kanë deklaruar me shkrim që kanë votuar në këto vendvotime të njëjtat nuk janë prova të sigurt dhe të besueshme dhe se këto prova nuk e identifikojnë votuesin, prandaj edhe nuk mund të vërtetohet se personat që kanë dhënë deklarate kanë votuar për kandidatin Avni Gashi, pra asnjë fletëvotim nuk e identifikon votuesin duke qenë se votimi është i fshehtë.

Paneli ka ndërmarrë hetim ashtu që më datë 12.11.2025 ka kërkuar nga KQZ, materialin zgjedhor lidhur me pretendimet ankimore të kandidatit Avni Gashi, dhe se njëjta ka siguruar materialin: Formularët e Rezultateve për kandidat, Librin e Votimit (Libri i shënimeve në vendvotim), si dhe Librin e Evidencës në QNR. Mirëpo, nga provat e siguruara paneli nuk mundi të vërtetoj ndonjë parregullsi apo vërejtje gjatë votimit, numërimit apo mos regjistrim të votës, si dhe nga fletëvotimet e arritura me postë, pasi që nuk ka mospërputhshmëri të rezultateve.

Pretendimi ankimor i kandidatit nga radhët e subjektit politik AAK, me numër rendor 5, Avni Gashi, se i njëjti ka fituar 97 vota, dhe se nuk i janë regjistruar votat e familjareve të tij, të cilët kanë votuar në këto qendra, për çka ka bashkangjitur edhe prova – deklarata, ky pretendim është i pa bazuar, pasi që, nuk ka ofruar prova të qarta dhe bindëse se në këto qendra të votimit kanë votuar familjarët e tij, njeherit Paneli pas hetimit ka konstatuar se nga hetimi i bërë rezulton se i njëjti të ketë marrë 97 vota, dhe se këto vota nuk mund të dihet se nga cili votues është votuar.

Paneli ka vlerësuar edhe pretendimet se në vendvotime janë bërë shkelje nga komisionarët e vendvotimit, por këto pretendime i ka vlerësuar si të pa bazuara, ngase numërimi për kandidatët asambleist bëhet në vetëm në Qendrën Komunale të Numërimit, numërimi bëhet në mënyrë transparente ashtu siç është paraparë me nenin 15 dhe 16 dhe 17 të Rregullores Zgjedhore 16/2024 dhe Procedurës së paraparë të Veprimit në Qendrën Komunale të Numërimit për zgjedhjet Lokale 2025, numërimi bëhet në Qendrën e Numërimit duke kaluar nëpërmes sistemit digjital, ku më këtë rast çdo fletëvotim në të dy anët shfaqet në ekran të cilën e shohin të gjithë personat e pranishëm, komisionarët, vëzhguesit e subjekteve politike dhe mediat e akredituara ku dhe mund të bëhen vërejtje lidhur me votat nëse duhet të konsiderohet e vlefshme apo jo.

Në vendvotimet SH.F.M.U "Hysni Zajmi" në Vrellë, Librin e Votimit dhe në Formularët e Rezultateve për kandidat në vendvotime: VV 0606/03, VV 0606/04 dhe VV 0606/05, si dhe në QV 0602, SH.F.M.U "Trepça" në Banjë të Pejës, Librin e Votimit dhe në Formularët e Rezultateve për kandidat në vendvotimet VV 0602/02, VV 0602/03, VV 0602/05, VV 0602/06, VV 0602/07 si dhe votat me postë VP06/07 Libri i Evidencës në QNR dhe në Formularin e Rezultateve të kandidatëve, paneli pas hetimit nuk ka gjetur se kishte ndonjë vërejtje apo kundërshtim apo mos regjistrim të votave.

Duhet cekur se lidhur me deklaratat e votuesve dhe fshehtësisë së votimit, është krijuar tashmë praktika gjyqësore nga se Gjykata Supreme me Aktgjykimin e saj AA.nr.61/2025 të datës 24.03.2025 kishte konstatuar se: *"deklaratat e votuesve të cilët pretendojnë se kanë votuar një kandidat të caktuar nuk mund të merren si prova të bazuara për faktin se nuk mund të vërtetohet në asnjë formë se votuesit përkatës të kenë votuar për subjektin e caktuar dhe kandidatin e caktuar për shkak se fletëvotimi nuk mund të identifikohet me emrin e votuesit"*.

Bazuar në të lartcekurat paneli vlerësoj se bazuar në nenin 117.3 të LZP-së përcaktohet se: *"Vendosja për ankesat nga PZAP-ja mbështetet në dëshmi të qarta dhe bindëse"*. Sipas kësaj dispozite ligjore parashtuesi i ankesës duhet të sjell dëshmi të qarta dhe bindëse lidhur me pretendimet e tij, por që me rastin e parashtimit të ankesës nga Avni Gashi, kandidat për asamblë komunale e subjektit politik AAK, nuk ka sjell dëshmi që vërtetohen pretendimet e tij, ndërsa pretendimet e tilla nuk kanë gjete mbështetje edhe pas hetimit dhe provave të siguruara nga PZAP, andaj pretendimi se duhet të ketë rinumërim të votave mbetet vetëm i natyrës deklarative dhe se nuk është mbështetur me asnjë provë që do të dëshmonte pretendimet ankimore.

Bazuar në arsyet e sipërshënuara dhe në kuptim të nenit 118.1 të LZP-së i cili parasheh se *"PZAP-i, pranon ankesat e bazuara në fakte dhe refuzon ankesat të cilat nuk i përmbushin kriteret e miratuara paraprakisht"* dhe Neni 13 paragrafi 4 i Rregullores Nr.01/2025 për Procedurat e Parashtimit dhe Vendosjes së Ankesave të PZAP-it, në të cilin përcaktohet se: *"PZAP-i mund në përgjithësi të refuzoj një ankesë apo grup ankesash nëse ato nuk paraqesin raste prima facie ose ku ankesa apo grupi i ankesave është dukshëm i pabazë"*, andaj vlerësoj se ankesa e lartë përmendur nuk është e bazuar dhe të njëjtën vendosi që ta refuzoj si në dispozitiv të këtij vendimi.

Nga arsyet e theksuar më lartë duke bazuar nenin 117 paragrafi 3, neni 118 paragrafi 1 të LZP-së, paneli vendosi si në dispozitiv të këtij vendimi.

Paneli Zgjedhor për Ankesa dhe Parashtresa

ZLAnr.389-2/2025 më datën 14.11.2025

Kryesuesi i Panelit
Skender Çoçaj



Këshilla Juridike: Kundër këtij vendimi është e lejuar ankesa sipas nenit 118 paragrafi 4 të Ligjit Nr.08/L-228 për Zgjedhjet e Përgjithshme në Republikën e Kosovës, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimi të këtij vendimi.